

«Zinc par zinc fâs vincjezzinc,
ta pozzate insòmp Tumièç.»

Cussì a si zicave a Tumièç.

RIMIS SU TUMIÈÇ

di

Federico Morocutti

2012

Indice

Tumièç e lis sôs monz

1998 - A Tumièç

Plazze Grande di Tunièç

Lusignute di Mariane

Incontro tra i siôrs e puars

La barache dai ucei

I puartis di Tumièç

TUMIÈÇ E LIS SÔS MONZ

*Da che Bût e Tajamènt a si cjatin e a van a stâze
a è la plane di Tumièç cu lis monz che ai fasin suâze.*

*Al è il Feste cul so fuàrt che al ven su a soreli jevât
e il plui alt San Simeòn al è sùbit li tacât.*

*Di une bande a jàn il lâc che a ju spièle che a ju mire
il Tajamènt a tor a ur gire che al mâr al ponte al tire.*

*La cjadene dal Faèit a finìs in tal Piciât
ancje jei a jà un pît tal lâc a si sa chel al è un fat.*

*Al continue il lunc Botài che a si tache tal Plombàde
il massiz dal ros Verzègnis a è une mont ben ben stacade.*

*A si viodin di lontàn i cretòns sul Tajamènt
il Tinisa al pâr plui dongje un gjgant un monumènt.*

*Il biel bec dal Cuel Gjentîl a si viôt a drete man
lui al domine la mont dal Lumiei fin al Deàn.*

*Sore Cjànive al è il Dobis che al no l'è l'ultim dal cjâr
dopo al ven il Diverdalce il Duròn e il Pic di Cuâr.*

*Plui indevânt dilà da Bût al è il Cuc il Val Medàn
e il Tersàdie che a si slungje daûr Strabût e San Floreàn.*

*A è restade la Mariane che a si alze biele drete
di Tumièç a è une bielezze cussì a plomp cul dint e la crete.*

1998 - A TUMIÈÇ

*O Tumièç, come centro tu seis nassût,
par fâ incontrâ la int da Cjargne e dal Friûl
propit achì sot Mariane e Strabût.*

*Cussi a ti an volût i patriarcjis, i dogjis di Vignesie
e i imperators todescs, francesi e ancjmò
todescs e amcje i res e la republiche d'Italie.*

*Par tancj agns tu as fat ben il to dovei,
fasint di centro par ducj i Cjargnei,
tu as vût cussì une tô degne identitât.*

*Tu as vût cussì une tô cjarade nete,
né sierade ne slavrade, cun tun zeta
stuzzichin che a la fâs precise e sclete.*

*In chest secul tecnologjic, tant tu seis cressût
cun cjasis e fabbrichis tra il Tajament e la Bût
e tante int gnove a è vegnude di ogni lûc.*

*Cres pur Tumièç, al pas da civiltât,
ma atent a no pierdi la tô miôr identitât,
propit cumò che tu seis diventât zitât.*

PLAZZE GRANDE DI TUMIÈÇ

*Plazze Grande, plazze Grande
tantis rÔbis tu as viodût
storie pizzule o pur grande
tante int cun te a jà vivût.*

*Cun pÔs puartis, elegante
e scuadrade ben benòn
viers il domo tu ti vierzis
ch'a ti slargje chel cjantòn.*

*E cussì, i biei palàz
che i timps a ti an portât
ti incornisin degnamenti
cul to domo il blanc sagrât.*

*E lì sore, la Picote
jù frondose cui siei vertz
tu da Cjargne une belezze
tu la plazze di Tumièç.*

LUSIGNUTE DI MARIANE

*Lusignute insomp Mariane
che cul gnot i tu ti impiis
tu fâs lûs a la Gran' Mâri
che a vêgle sui siei fîs*

*e tal gnot cuanc che lis stelis
a tempiestin il cîl seren
tancj ti cirin tra chês bielis
che a brilin cussì ben*

*e lassù la tô lusute
a si viôt in tai paîs
un pensîr pa Madonute
in Mariane ducj i dîs.*

TUMIÈÇ – FIESTE DA MADONE DAL CARMINE

Sâgre dal Borgàt
INCONTRO TRA I SIÔRS E I PUARS

Oms e feminis di Cjavrîs
si vestissin di siorez,
chei invece di Plazzute
si vestissin di puarez.

Borghesi e popolâns
a saressin di clamâ,
siôrs e puars a è la diferenze
che di plui a si fâs cjalâ.

Come fradis lôr s'incontrin,
come ch'à vûl la tardizion,
in chel dì ch'a si festegje la Madone
dal Carmine, cu la procession.

Lis cjampanis tal Borgàt a lunc
a sunin il lôr legri campanon,
ducj i borcs a son clamâz
a rinovâ la lôr devozion.

Bandierinis in Plazzute,
golosez, 'zûcs, mùsiche e fusetis,
gnûfs amôrs e frutis bielîs
setin siôris o puaretis.

Sagre plene, siôrs e puars
ducj insieme tal Borgàt,
ma sul pâl da cucagne
a tocje lâ su a gjat.

In che dì a par di jessi
ducj compagns ta chel 'zuâ
e se propit a no è vere,
cui sa, ch'a no veti di 'zovâ.

Tumièç “Mercjât dai Sanz” 2001

LA BARACHE DAI UCEI

*Sot di cjase tal mercjât
la barache dai ucei
e il borc al è diventât
dut un legri ciu ci.*

*Une schirie di sgjaibeutis
e ucei di tancj colôrs,
altris sgjaibis cui cunîns
simpri atènz e timorôs.*

*I cjanûz a son tas covis
inzussîz, sbiros o spaventâz,
tal soreli a son lis vaschis
cui pes ros, neris e misclizzaz.*

*I uceluz cu lis mossutis
a saltuzzin cibicânt,
i pes ros ta l'aghe a lusin
svelz si movin svirgulânt.*

*A si ferme une fantate
a cjarezze un cjanût,
po lu lasse cun languôr
e si volte a dai un cuc.*

*Incjantâz a son i fruz
che a voressin comprâ dut,
ma che dopo si contentin
di lâ vie cun tun pessut.*

*Oms e feminis si fermin
alc a cjase a vulin portâ,
alc di vîf e di ninìn
une sorprese al lôr frutìn.*

I PUARTIS DI TUMIÈÇ

*A son pôs i paîs cui puartis seti in Cjargne che in Friûl,
ma Tumièç al à i siei puartis no grandòns ma ben metûz.
Da plazzute a plazze a grande a son puartis di lunc fur,
biei e alz a son chei da plazze che si slungjin in vie Cavour.*

*Cu lis lôr buteghis viertis a son vècjôs son vècjons
tante int sot di lôr a è passade, tante vite tant lavôr.
Sot i arcs dai vècjôs puartis son passaz puars e siôrs
e tancj fruts a iu an gjoldûz movinsi libars a tor di lôr.*

*Lôr ti parin dal soreli che pur a ur dà il lusôr
e un pôc a ti confuartin cuant che propit al è nulôr,
ma s'al plôf o s'al nevê e al pâr dificil di la fûr
tu pos lâ ta l'ostarie a son i puartis li di fûr.*